

欽  
定  
全  
唐  
文

欽定全唐文卷四百二十三目錄

于邵一

玉版元記頌 并序

降誕頌 并序

唐劍南東川節度使鮮于公經武頌

中書門下請上尊號第一表

第二表

第三表

第四表

請冊皇太子表

第二表

中書門下請聽政表

第二表

第三表

勸釋服聽政表

第二表

第三表

欽定全唐文卷四百二十三

于邵一

邵字相門京兆萬年人天寶末進士授崇文館校書郎累  
遷兵部郎中拜諫議大夫知制誥再遷禮部侍郎貞元初  
除太子賓客出爲杭州刺史以疾請告貶衢州別駕移江  
州卒年八十一

玉版元記頌

并序

草莽臣稽首獻頌曰臣聞殊祥大報者皇天無私慎終追  
遠者祖考來格皆上帝之所協德豈蒸人之克預也我皇

帝陛下建皇極行大道體元以煦覆品物以陶運執斗柄而四序潛迴張地維而八埏至靜四十載矣而天下大順巍巍乎其全功歟元元皇帝陛下之烈祖也寶慈儉以垂後昆法清靜而示教文厯千百祀而陛下道存妙有化洽無爲動之太和寂以元覽非得一而正乎陛下執大象敷元宗聖祖儀刑於郡國景命紛紜於圖史者蓋百數矣開靈寶於分陝之郊克復明號形縞衣於降聖之閣時庸展親探三華於丹墀之上近而得也想五利於滄波之外遠而治也故朴畧之初三五以降曾不敢以功階並也今太

白山人李渾等暫因形動未假神游初入緇帷之林忽變  
紫微之境古祠之下猶龍肅然霽色雖澈於清霄榮光自  
分於白晝元宮咫尺仙衛徘徊接霓裳以受辭奉玉顏而  
專對光啟王室宣昭祖孫方錄實而未宏緬逖聰而奚取  
由命京畿採訪使戶部侍郎兼御史中丞王鉷發皇華而  
載馳望白雲之有處瞻仰如在真風宛同歷五洞之杳冥  
尋一門之竄窅行前有會感而遂通石臺菡萏而特秀玉  
版熒煌而自祕式傳無忽祇受不差天香氛氲甘液浹洽  
陽烏抱戴而上燭卿雲交映而前引率皆科斗之文時人

無能之者陛下乃齋心服形絕聖棄知閒居於大庭之館  
游夢於華胥之國而後攝外慮嚴天思捧元記而納宸極  
洞一時而覩萬物其辭炳燿而有屬其義綿延而自久齊  
聖壽於日月恢國祚於宇宙上和天地下以洽神人臣  
不知其天之爲大也如此遂下明詔臨百官荷億載之殊  
慶追六聖之遺謚旣撰日以嚴配親大袷於閔宮鳴鸞以  
和清蹕在聽臣又以開闢之後無以尚之於是文武百辟  
蠻夷君長洎黃縑老幼各有等威雲趨玉闕而請曰陛下  
奉天之昭錫承祖之大命百王無以徵其符千載不復遇

斯瑞崇累朝之德孝之大者掩至尊之美謙莫甚乎旣而  
天聽未迴睿獎猶邈臣下罔知寢處黎人咸造勿褻而言  
曰天其或者以天下之物無可以稱陛下之德故纘戎徽  
號因聖祖以發明令陛下不得不名之固非一時之所強  
名也書曰不臧厥臧人罔攸勸願陛下臧而勸之抑讓之  
至於三方霈然曰俞哉斯亦天之所俾也遂命稽皇典序  
國儀韶濩作韶蟬進纂鴻猷而尊冊之明大訓而奉行之  
雷雨作解小大以正四靈在郊藪以待命三光出躔次而  
延澤豈祇羣臣之私乎率土之私乎臣生沐浴風欽承寶



金華志卷之三  
名臣三  
三  
化百揆時敘空聞賡載之歌三階底平久著登風之頌伏  
以神功丕應潤澤生靈挹超代之範圍與下人之陰隲方  
軼於周王游玉黃帝迎年豈與夫河東壽宮棫陽薦磬而  
已哉仲尼以舜禹之事邱不得預議者以方今之盛臣實  
預焉庶效采詩之典曾何萬分之一伏獻頌曰

巖巖太白列仙是宅八會真歌三清羽客幽陰肅爽處處  
靈跡皇唐上祖天人元君揮斤六合時乘五雲貽厥景命  
昭我聖勲神靈宣功華芝獻壽薦錫元記光資妙有玉字  
天長石臺地久億載新兆千齡古書字形科斗臺狀芙蓉

神力莫測象帝之初烈烈遺諡清廟崇之明明徽號我后  
尊之天授玉記惟皇之楨微臣薦頌游聖難名

降誕頌并序

皇唐八葉之中興提天綱披寶圖臨八紘俯萬物垂鴻儲  
休粵十有七年元冬陽月旬外三日天子居北堂左个受  
厥初之慶自予弼臣百官丞令咸歸休澣則歌康衢樂壽  
域者具百姓之歡心有司諫掌綸之臣當右掖分宵之直  
望閭闔沐薰風齋心以虔稽首獻頌其詞曰

甲觀畫堂繞樞神光十月良日降生我皇焜殊祥兮纘武

繼文時惟聖勲格苗戡黎爲天下君望如雲兮蒼蒼海隅  
達我天衢七戎蠹狄西殲北徂外無虞兮白翟遐通嘉禾  
薦豐兩樹連理五雲飛空歸大同兮金闕戕戕清晨伊何  
萬國筐篚千門詠歌歆太和兮舜膳以甘堯尊以酎誕彌  
之朔旬而有三湛恩覃兮南山于前北辰于天臣某獻壽  
維億萬年象帝先兮

唐劍南東川節度使鮮于公經武頌

皇唐八葉伐叛取亂再寧區夏四海絕橫流九州無匪人  
制要荒以從述職分周召以相夾輔有多士爲內理有方

鎮爲外攘垂衣裳而御極惟十有三祀矣大劍之南自秦  
惠疏疆是一都之會南蠻西戎舊爲敵國伺我休戚爲爾  
進退國家之有天下也或懷柔羈縻與之連和或掩義背  
德與之交鋒尋盟問罪不無事矣當天寶中河隴之外却  
地千里赤山青海不敢飲牧絕漠無跡我嘗有之屬燕薊  
猾亂毒痛生人羣盜乘時豐彼戎復舊怨是以綠林遁藪  
白晝殘人池隍鞠爲茂草邑里化爲煨燼墜瓦萬聚頽垣  
一平大厯三年夏六月分命漁陽伯鮮于公擁旄仗鉞總  
統東川八州之地自閬之外帝俞欽哉公才包五行體合

四氣揮若神劍扣如鴻鍾其始也凜之以威其漸也濟之以恩作之君師爲之父母由是遠者來來者安也於是驅豺狼之所嗥翦荆棘之所蔽一之歲二之歲葺郡邑正疆理而樹牙幢三之歲四之歲闢田疇閭帑藏而耀軍實五之歲而甲兵大振六之歲而勇可賈餘七之歲而人有聚訓有常矣無暴可禁所謂保大定功有財斯豐所謂安人和衆兼之者不戰而勝兵將戢乎畿內諸侯始有賴而捍戎於邠隴矣則知漁陽公外陳藩屏而助威武於鑠哉其爲人臣之式歟方今龍安屬邑久爲重門待暴之地壤連

西山分我天限有間道可以招戎偵有絕險可以資敵國  
頻年發中軍之倖爲之鎮守今秋自元戎十乘以先啟行  
白露始降秋草方實筋角勁而膂力旣堅樵蘇積而糗糧  
斯峙如熊羆曰千夫長如貔虎曰百夫特前茅後勁不戮  
一人君子曰軍政不戒而備矣以此料敵兵必勝戰必剋  
我武惟揚休有烈光福履所將壽考無疆其猷克壯而佐  
堯翊湯不其盛歟公名晉字叔明漁陽縣人也其先殷人  
箕子處其地世有君長北方之強歟至西漢有京兆尹褒  
惠東漢虎牙將軍輔散遷伊洛相衛之間垂裕後昆繼世

流慶粵有高祖父康紹後牧于閩解印寓於新政縣洎曾  
王父與王父因家焉衣冠來裔松檟斯茂實膏腴而止斯  
樂土正版圖而終移關內今復爲長安人也公先兄仲通  
擢桂枝綰黃綬不十年而權生殺於梁益之地入爲京兆  
尹公自孝廉專經高第再參環衛累拜棘司四遷柱史連  
擢華省宰洛邑時號神明牧商於人歌父母有詔加金商  
均房等州觀察使處置使又入爲京兆尹厯左右宮相出  
牧臨邛兼御史中丞充邛南招討都團練使由中司復加  
節制焉尋遷御史大夫朝廷以爲今之二難時也卓絕載

形詔旨談者榮之方將登金鋪調玉鼎徼蒼生之福豈懾  
殊俗收係虜從衛霍之事乎邵忝嘉賓之末猥廁諸侯之  
選拜賜之辱奉以周旋頌聲不作無以報德發彼馨香存  
乎琬玉匪報也永以爲好遂作頌曰

金火間秀實生有德風雲所感以佐王國龍韜豹畧天資  
默識敦詩說禮行有餘力忠於事君立名底績鴻鵠斯舉  
驂騑登跡風雨如晦我心匪易三川震蕩萬里沙磧宗社  
旣安君臣正焉乃睠西顧實爲東川東川伊何人其播遷  
邑有遺賂家無舊阡爰命虎臣仗茲犀節上天下地惟爾



之發拉彼羣逋輯我遊闕躬之先之不日不月七載勤勸  
三軍克振龍安之役伐原示信么戎宣驕則我觀豐玉帳  
潛機金鉦俟進漢思營平先零之功班壯車騎燕然以封  
軍之所樂吾之所從門生獻頌豈二子之所疇庸哉

中書門下請上尊號第一表

臣炎等言臣聞自古帝王配天受命必建徽號傳之無窮  
號者功之表也三五以降皆約所著之功以彰厥德則犧  
農軒頊之號或質勝文而文勝質悉以一時盛烈而崇號  
焉伏惟皇帝陛下纘戎立極紹庭應運居域中之大爲天

下之君聖敬日躋孝理時乂放珍禽奇獸爲異方遠物畧  
嘉禾美瑞俾良史不書洪惟成湯一德率先老氏三寶舞  
干是務和戎是利惟賢是登惟惡是去雖夏后卑宮菲食  
漢文帷囊弋絳與我比崇彼實懃德今陵園永閼升祔云  
畢孝思罔極達於神明克禋克祀卜時撰吉載命元子光  
啟諸君禮無不備道無不洽而鴻名未揚典故猶缺將何  
以告清廟謁聖祖對越神祇昭格上下伏乞許臣等上尊  
號以備大禮有以答乾坤之貺有以符億兆之歡臣等才  
非啟沃職叅近侍遠愧賡歌空懷赤實不勝懇願屏營之

至謹奉表陳請以聞

第二表

臣炎等言伏以表鴻勲尊明號百王之宏典八聖之嗣烈則可祖述古訓憲章前範上以明帝王無私于已下以表臣子行古之道所以詢於公卿稽彼典常冒昧爲請期於必從奉詔還答未蒙聽允阻臣子之協同彰聖人之謙甚當此反側得爲安乎臣炎等誠惶誠迫頓首頓首臣聞上覆有名曰天下載有名曰地天地尚著於名位而陛下父母天地端居大寶獨無名乎臣等固知其不可謂此况踰

年作制履端於始啟迪乾運祇膺天秩此皆宗社廼瞻元  
元式瞻其當至公不在謙已伏惟陛下首在藩邸親總六  
軍屬彼昆夷乘我間釁犯我都鄙卮鑒興以東幸奮馳武  
以旋師一呼而上將雲奔傳檄而遠蕃磨至朝廷以正華  
夏以寧旋表元良迨茲臨御顧命之後畏天之威躬履節  
用勤於宵旰大孝感於神明茂功由乎發號友愛日至觀  
行不忘顧升平以儉致將來遠以德服風雨時若妖氛不  
動夫然則俗可追於大庭人可納於壽域而欲忽鴻名缺  
人望固以自約其可得乎臣等才謝將明力慙匡輔欣逢

至道竊荷寵光願回天私獲罪丹悃無任懇迫屏營之至  
謹奉表陳請以聞

第三表

臣炎等言臣等考古訓酌羣言建大中之道陳徽號之請  
累表上聞皆抑而未許跼天悚迫屏營失圖臣固以此請  
者方欲協萬國之歡繫一人之本蓋非私於主而專於已  
實以荷大賚法上元遵王之路也伏惟皇帝陛下以唐堯  
四德光宅天下以周文直行陟降庭止應乾立極迨乎逾  
年又奉今月甲寅詔將有事於郊廟越翼日乙卯復下有

司命元子以主器薦珪置幣尊祖配嚴屬車將邁明號未  
布瞻望霄極遐哉邈乎至乃陳一王之儀合百神之禮祝  
告史載則謂之何臣又聞之守文纘服繼序不忘遵奉遺  
烈必思其復惟高祖象雲雷以起經綸惟太宗造區夏以  
創大業惟元宗倚孤劍以攘臂惟肅宗振一旅而討逆惟  
代宗總天兵以佐命皆拯生人之崩角安國家之綴旒德  
澤洽於上蒼功業冠於邃古而皆順人心以敬天命享大  
名而騰茂實況陛下居雍邸將天下奔西戎約北狄此所  
以彰武功也其在望苑則問安視膳春誦夏弦尊師以廣

其聰明敬老以全其羽翼此所以懿文德也及受顧命反  
居諒闇勺飲不入杖而後起同軌不踰於七月升祔永終  
於九虞此所以昭大孝也克勤於邦日親萬務克儉於用  
化行四海珍禽奇獸不育於國沉珠捐金不受於人此所  
以返太素也有一於此則可以發揮鴻休光啟尊號豈可  
尚懷謙損莫顧與能九廟之靈儼思虔告百辟之望終期  
必從陛下必欲固拒羣心輕此盛典則祖宗之前號盡爲  
虛美陛下安得而墮之臣愚故知其不可也臣等待罪掖  
垣屢陳愚款儻未迴天睠將萬請以之無任大願悽悽之

至謹奉表昧死以聞

第四表

臣仰稽舊章虔上尊號懇誠三瀝中旨未回朝野惶然罔  
知攸措臣等誠惶誠恐頓首頓首臣聞帝王御極作人司  
牧德盛者爰加顯號功高者必建鴻名是用叶天地之符  
塞神祇之望榮非爲已義實徇公爰在累聖必從衆欲陞  
下踐寶祚握瑤圖懸日月而照九圍鼓雷霆而清八極故  
得吳蜀電滅齊蔡砥平攄祖宗之宿憤救黎元於焚溺今  
日者威加四海澤浸八荒文軌罔不同華夷罔不服政刑



罔不舉符瑞罔不臻闢再造之宏規致中興之昌運而大典猶鬱徽號未崇何以副萬國之心何以答三靈之貺臣等謬居樞近累黷宸嚴望九重之俯從爲千載之榮遇雖則祈天之奏伏蒲而未感所冀回日之誠傾藿而必遂臣等不勝懇款屏營之至

請冊皇太子表

臣聞立天下之本故受之以震明兩承統慶元有光期萬國以貞而一人有慶也伏惟皇帝陛下受天明命尊祖嚴配聖謨廣運禮秩咸若六親承式而理六合不論而定伏

以儲宮未立人望猶勤奉天順人事不可曠夙聞宣王天  
資孝敬訓稟詩禮可以奉宗祧之重可以當上鬯之主朝  
三命宰則以安親前師後傅則以齒胄伏乞以時冊命報  
慶天人然後啟承華以論道起博望而養德天下幸甚天  
下幸甚臣等叅跡樞密倍萬恒情謹奉表陳請以聞

## 第二表

臣等言今月十六日敢以古義請建皇儲伏奉恩命未垂  
允答受命兢悚恍然失圖臣等惶恐頓首臣聞皇王之理  
必先體統而後正百度以臨四方修人紀以符天道則居

震守器重離繼明是先代行於天下也況尊宗廟而奉君親乎此而不先孰可先者陛下尚執謙德方勤庶政略至公之務慎翼子之私是以小嫌而廢前訓今臣等不敢以歷代爲據且以國朝以來言之有若高祖義寧二年五月即位六月立建成爲皇太子太宗武德九年八月即位十月立中山王爲皇太子高宗貞觀二十三年六月即位七月立陳王爲皇太子則祖宗垂範如示諸掌今抑而不立豈塞天下之望伏聞宣王以子則嫡以家則孝天姿玉裕雅性沖深足以奉棗盛之重視朝夕之膳然則行一物而

三善皆得者建儲之謂也臣等不勝大願懇請之至

中書門下請聽政表

臣某言臣及文武百寮上乞奉遵遺詔俯垂聽政迨於再三尚阻羣請所天未覆何地自容伏自焦惶罔知攸處臣以因心之感是陛下私戚顧命之重是先帝至公未有因私戚而忘至公居大寶而懷小節者也且漢文昔王之賢者豈欲垂訓作則自虧其道而後嗣忘其孝思蓋所以垂時制禮從權體國千載不易直道而行曾參閔損俯就者家也周康漢景仰就者國也安以一家之行而隳萬國之

務乎今陛下禮以自拘

關一  
字

爲全孝臣謂從而觀志存其

中則明遺制不可徇禮而忽萬務不可一日而曠臣又聞  
之子事父以無違臣事君以替否臣陪陛下需承末命臣  
言未感甘受不忠陛下固辭豈得稱孝特乞受憑几之顧  
託損蓼莪之哀思以時闡皇綱創帝範副人之所望悅億  
兆之心寧止宗社焉依實將教

關一  
字

速及披肝屢啟冀獲  
哀從無任崩迫彷徨之至

第二表

臣等欽承顧命遵守舊章冒陳至理上喧霄極冀迴三舍

以幸萬方而呼天未聞觸地無厝庶僚何恃而不忍率土  
何仰而不憂至如仙駕在天元猷未遠窮崩之慕臣子之  
極同況陛下新離供養纏哀風樹誠不宜屢黷嚴續仰傷  
聖心臣等備位台衡與國休戚所顧者小節所全者大體  
是用頻煩干奏隕越爲期臣某中謝竊以三漢成規備乎  
典冊六宗遺範列在史官厯羣聖無以易其儀貫百王無  
以更斯制則知聖人達節而俯就王者屈已以徇時故周  
發誓師當未葬之日康王作誥繼憑几之辰夫大孝在於  
述先執禮懲乎廢命所以伯魚止慟稟趨庭之規孝景抑

情循易月之制弛張期乎得中壓降在於適時今中夏雖  
寧而外郊猶警幸屬千年嗣聖九有惟新顧循問豎之初  
迨今宅憂之日已交肫魄不決外虞普天率土任重事殷  
一日暫曠萬務所擁况翌日之詔手澤猶存敢忘導揚以  
塞恩顧且小大之理須稟聖規聽斷之期已違先旨庶政  
羣情惟上帝之降命屬陛下以黎元宜以闡皇綱創帝範  
副靈祇之望悅兆庶之心焉得極蓼莪之哀忽宗社之重  
伏惟陛下仰思無改之道俯戒在茅之責抑損至情覽決  
庶務存萬代之固遺一介之善率繇大道克允至公天下

幸甚天下幸甚

第三表

臣某言稱情立制禮經美人道之文屈已從宜前史稱我王之孝故魏文膈臆以莅事晉襄纒經而從師誠有由然非不懷也伏惟皇帝陛下屬當聖業纏思遺弓至性出於自然孝情稟於天質雖考妣之慟被於含齒而皇王之道寧有常心天下之志宜通太陽之照難闕況百度惟始萬目未張遂叫帝閭期抑舜慕雖封章累至而閭闔不開九服失圖羣司沮色豈悟至誠不昧有感必通今日中使某



至伏羲昭迴天鑒允納窮款皇風廣被神詔沛然觀象於  
天同伏羲之始畫奉先思孝狹武丁之不言厭極愛於祖  
宗體乾行之覆育周漢所以繼理政術魏晉由是經綸理  
道實足垂風萬古作範百王豁億兆惶惑之心示人祇聞  
奏之路百穀荷膏雨之澤羣生覩天地之初以悲以歡載  
號載懼

勸釋服聽政表

臣某等言再奉恩敕聖心永慕未忍割哀過大祥則素衣  
練冠銜恤聽政當外除則降從禫服以終喪紀者羣臣等

重於荒迫之中頻奉不忍之詔精魂飛越兢惶失圖臣某等中謝伏惟皇帝陛下孝心自天孝道逾禮宅憂之日痛感人神顧命之文興言不忍微臣等前後五表昧死上陳雖皇恩抑從而猶至十日自鼎湖升馭俯及祥除其間惟見羣臣禮展哀感又伏聞杖不能起哭不絕聲常膳頓減至於一溢以王者之尊過子臯之毀然臣等伏以三年之喪古稱云達禮者前王之舊制也三日而聽政二十七日而釋服者先王之遺令也今陛下不勝罔極之痛欲遂因心之哀遠追前古之禮近廢無違之義愚臣荒塞莫知死

所且梓宮未遷於陵隧聖慮方切於哀號雖釋服臨朝慰撫臣子猶恐天顏慘戚率土不安羣臣未通庶事皆闕方今以練冠爲易月之服禪制終諒闇之喪羣臣進見莫勝憂戚又安敢議及時政下延兆庶者哉遐邇幽明同知不可伏乞聖情深思園陵興作之務仰順先聖殷憂之說上尊祖宗傳襲之典請釋服之注俯從有司銜哀永懷豈有時日萬人之命懸在聖躬今臣等昧死請不奉詔上冒宸嚴心魂兢悸言辭失序無任憂國切迫之至

## 第二表

臣等至哀至切昧死上表乞奉遺詔順時釋服日月有期而精誠未達率土臣子未知所從況在朝行伏待斧鑕臣等伏以昔漢文帝初制易月之禮以爲帝王者不可因喪而廢政若君上重服則率土何心爰建此儀以垂後葉自爾至今殆千載矣豈無哲王皆所尊奉聖朝奄有四海撫寧萬邦重光睿圖孝理天下臣不敢備引前古以煩聖聽乞畧陳元宗先帝即位故事耆老當日所見聞者皆以日易月依禮外除有司繼存儀注尚在臣敢罔冒伏受嚴刑且先王制禮禪服止於兩月爲日正當兩日今詔旨降從

禪服以終喪臣雖固陋不達禮本今服禪三載實所未聞  
况君者天也豈有天意慘愴萬物得遂其性父懷隱痛赤  
子得安其心哉陛下若固違羣言未奉遺詔非惟臣子哀  
懼實恐蠻貊不安非陽和發生之道聖人順物之義愚臣  
等心之所切抵冒國章形神悚越文理繁穢頻黷宸庶  
感天心雖死之日將無所恨無任惶悚之至

第三表

臣某等言伏聞事有至公不敢避責確守臣職不敢逃刑  
天心未從有死無二臣伏以大行皇帝憑几顧命俾二十

七日而釋服者蓋以天下事重軫慮于懷陛下至孝純深必多損毀竊思因創巨之痛忘艱難之業累聖鴻緒萬邦赤子或一事不得其所豈非重服傷生之患哉所以當大漸之辰託殷憂之命蓋緣社稷之遠計須抑陛下之至情遺旨若此猶未甚割哀況無制命則如何上請且攢宮尚臨於前殿陵寢方興於復土朝野縞素殆將三旬雖聽政俯在於天心而庶務未親其萬一今又禫服終制普告四方典章文物何所設施且西戎北狄頃歲未賓涼秋氣高每伺邊隙今若聞國有大故喪又未除姦謀或生事則非

遠雖皇威遐振應時掃除然思患之道必戒不虞善師不陣蓋在此也今陛下若御常服決大事不逾月之內天聲被於八極凡厥夷貊聳聽皇猷自然大者畏威小者懷德稽顙率賦疆場無虞告成之功上薦於帝則先皇帝之遺旨行矣天子之大孝備矣羣下之所願遂矣萬國之兆庶安矣陛下不思此事之利害忍違臣子之誠心此臣等所以兢惶無措哀迫失圖叩心三請上冒天憲死而利國臣不敢辭臣之丹心天地明察無任兢迫之至

欽定全唐文卷四百二十四目錄

于邵二

爲京兆第五尹請車駕廻西京表

賀郭子儀破吐蕃表

賀破賊表

謝恩寫真表

謝賜銀器及匹帛等表

謝恩賜春衣表

爲福建李中丞謝上表



爲柳州鄭郎中謝上表

武州刺史謝上表

爲張監謝天長節答賜表

爲許卿謝堂弟叔冀授青州節度使表

爲崔鄴公謝除鳳翔節度使表

爲崔鄴公謝勅追赴京表

爲崔僕射謝恩賜表

爲崔僕射謝許弟寬宣慰表

爲崔僕射謝弟除給事中表

爲西川崔僕射謝却赴劍南表

謝贈亡妻鄭國夫人表

爲商州吳仲儒中丞讓起復表

爲楊相求退表

爲田僕射薨謝制使問表

謝贈姊隴西郡夫人表

欽定全唐文卷四百二十四

于邵二

爲京兆第五尹請車駕迴西京表

臣某言臣聞古公去邠初因避狄襄王出鄭終見興周故  
能成九五之尊享八百之祚載在前史昭然可知伏惟元  
聖文武皇帝陛下道洽四國威加八紘啟中興之運宏下  
武之功殊方異俗重譯交順惟犬戎小醜敢亂天常陵逼  
豐鎬震驚都邑陛下理兵陝服遣將秦川鷁張未幾狗遊  
自溺今八川底定萬姓怨思同懷捧日之誠共結屬車之

望况地稱百二勢比咽喉足以橫制九圍財成六合陛下  
豈可捨山川之固爲巡省之遊臣雖至愚竊知不可伏願  
謀及百辟俯徇羣心迴鑾舊宮駐蹕西夏使百川有朝宗  
之所眾星復環拱之方凡在有形孰不幸甚無任懇歎涕  
戀之至謹遣某官奉表陳情以聞

賀郭子儀破吐蕃表

臣某言今日吳承倩至奉宣進止示臣關內河東副元帥  
司徒兼中書令汾陽王郭子儀奏捷狀李懷光於鹽州界  
積石川大破吐蕃一萬餘眾生擒斬首共六千餘級獲牛

馬及器械不可勝數者伏以聖畧遠加制勝前定神功不測告捷如期吐蕃忘國厚恩歲犯邊境陛下料其進退知其無策親以規模授於諸將以鹽夏之路地曠人稀嘗語臣曰此賊秋中必來擾鹽夏今覩成擒之處果於所料之中俘馘既多羊馬甚眾此皆宸心懸照不差毫髮天威遠被克壯師徒遂令智勇雲起妖氛電掃合符聖斷有此豐功子儀狀又云計日追蹤必當再捷者臣以蕃醜久逋聖誅從此氣衰必當瓦解坐觀無外之慶載美卽敘之勲罷柝可期戢戈有望親承睿算忽驗於今奉覩戎捷不勝慶

快之至

賀破賊表

臣某言臣聞春生秋殺天之令也撫順討逆國之教也故王者上法震耀下修典型雖當垂拱之朝亦整干戈之用伏見今月十日神策行營節度使尚可孤破藍田賊堡生擒賊僞署御史大夫仇敬忠斬獲共二千餘人者初從摩壘旋即合圍因乘破竹之威不漏枯池之網臣某中賀伏惟皇帝陛下聲教以文暢禍亂以武戮奄有華夏光臨統厯日者叢爾朱泚怙亂涇原腥穢官闕僭賊神器陰連叛

將竊緩輿屍實由逆賊仇敬忠等姦兇相資狡惡爲事因  
山據嶽欲抗雷霆之誅積粟輓芻冀延晷刻之命殊不知  
天威不遠睿算何逃未終瘐狗之狂已觸駭駭之勢餘兇  
奪魄義眾增威掃氛侵於順風復京師於不日臣謬兼統  
帥濫總禁戎矢石不親虛當坐制之地兇渠尚在終決前  
驅之心無任慶快之至

謝恩寫真表

臣某言今日中使至伏奉聖慈特賜寫臣容貌絹圖一  
本跪捧殊賜兢忭交馳臣某中謝臣聞兩漢功勲國朝將

相咸傳風彩遂列丹青非爲當代之榮亦欲後來之識臣  
功無半古貌未出羣叨承明主之恩久冠台司之首重蒙  
渥澤特降畫工神旣盡傳照無遺寫從衰朽之質別荷寵  
光分遭遇之形長含喜氣誠慚鎮俗頗近恭人祇嚴如見  
於大賓拂拭信歸於天造驅馳聖運撫躬未負於微誠唐  
突前賢顧影不無於愧色足以流傳不朽舒卷無窮君父  
迴恩便是百身之報子孫爲寶知承一顧之榮無任兢荷  
屏營之至

謝賜銀器及匹帛等表



臣某言今日中使奉宣進止賜臣銀器壺瓶各一銀  
梳一并蓋錦帳一錦九疋白熟綾十疋色羅五十疋雜綵  
一百三十疋者恩私荐及跪捧增慙雖雨露殊深而心魂  
若厲何則臣之受遇有異朝班任重元戎榮登上相自當  
盡瘁與國同憂豈比常人妄加厚賜況戎夷初退帑藏猶  
虛每欲傾家以供國用區區之願神明所知乞回此物復  
歸內府下以備六軍之寵賜上以奉一人之宴私臣之鄙  
懷於斯萬足其器物等臣已勒押衙試少監郭某詣右銀  
臺門別狀奉進

謝恩賜春衣表

右今月某日中使某至伏奉敕書手詔慰諭臣及三軍等并賜臣及大將春衣者捧戴忭躍實增慙懼臣功效微薄寵遇日深霜露適濡恩已承於挾纊清明纔度賜又及於解衣仰服用於公家罷裁縫於私室已頒分大將訖各盡殫戎之力用申報國之誠

爲福建李中丞謝上表

臣某言臣以二月二十四日特奉渥恩授臣福建都團練觀察處置等使福州刺史兼御史中丞某月二十九日與

中使某南北路分卽以今月某日至所部上訖感戴踰涯  
跼天增懼臣某誠惶誠恐頓首頓首臣聞度材任器論吏  
底祿三代所以直道而行迭相沿襲未之易也伏惟皇帝  
陛下聖謨廣運光宅天下德澤遐溢蒼生海隅至若閩越  
都會東南重鎮爰思俾乂宜者甚衆則中外咨謀孰非俊  
選豈臣薄劣一無所取超獎不次特稟宸衷是以前表上  
陳披肝布懇自茲夙夜不遑厖寧况今右武之狀方資輯  
睦安人之切又藉綏懷貢賦不差於時蠻夷得令安堵惟  
是四者之備皆臣之職分也誓將克勤竭力處約勵心日

欽定四庫全書  
卷一百一十五  
宣皇化以展微誠無任忘軀報國之至謹遣某官奉表陳  
謝以聞臣某誠惶誠恐頓首頓首謹言

爲柳州鄭郎中謝上表

臣某言臣伏奉某月日制書授臣某官卽以今日到任  
上訖臣某中謝臣緒承舊族師事通儒萬里成功雖無壯  
志九夷不陋庶纂前蹤二紀蠻陬三提郡印惟貞苦節以  
奉休辰牙管一雙未嘗關慮竹書兼兩何敢輕懷渭水之  
陰敝廬斯託每還初服常慊上農今者又卽殊方復臨雜  
族固蒙聲教終遠文明謹當宣舉詔書撫安縣道媒官學

舍畢納於人倫畜蠱帶牛盡移於地利至於因遐弄法挾  
遠生情縱漏嚴科必貽陰責山兼象縣江帶龍城撫心跼  
天敢忘元造舉頭望日何處皇居憑宵夢以銜誠託歸飛  
而結懇無任瞻天戀闕之至

武州刺史謝上表

臣某言伏奉今月日制除臣兼武州刺史本官勲封如故  
寵榮洊及忝竊逾涯心魂驚越啟處無地臣某中謝臣本  
虛賤生遇休明雖迹淹戎伍而功微涓滴自陛下聖理天  
下孝感神明任人惟舊在物無棄故臣得參定洛汭凱旋

金匱要略卷之二十一  
二  
鎬京職分上卿位列特進材力之所不足官謗之所自貽  
跼天躋地心愧顏厚殞身滅迹無以上報猶且恤臣家孥  
放臣休沐遂嬰疾苦未及歸朝一年以還四命爲牧內省  
尸素空勒竹符將免胄而有期且戴天而何日卽以今月  
日至州上訖奉宣王化以靖方隅誓求人瘼勉守亭障無  
任負恩勵節之至

爲張監謝天長節答賜表

臣某言伏奉恩命賜臣若干物寵錫自天兢愧無地臣某  
誠歡誠喜頓首頓首伏惟開元天地大寶聖文神武應道

皇帝陛下寶運應期金秋表節慶邁賡歌之曲歡同率土  
之濱循之由哀無以展禮輒獻衣鏡式陳懇款不謂聖慈  
迴顧允納涓涔宸光曲臨行及惠賜載驚載懼罔知攸處  
臣本愚直早荷賞延陛下念舊勲庸擢臣專典御府盡忠  
不足報德勞力豈曰幹時空勤日慎之心以副夙興之戒  
無任感戴屏營之至謹奉表陳謝以聞臣某誠歡誠喜頓  
首頓首謹言

爲許卿謝堂弟叔冀授青州節度使表

臣某言伏奉今月二十二日恩制除臣堂弟叔冀青州刺

史兼御史大夫充淄青等五州節度使不次之恩特出聖  
鑒大來之慶延及宗親彷徨若驚啟處無措臣某誠歡誠  
喜頓首頓首臣聞應天順人將將之道也保大定功將兵  
之道也然後賞罰二柄懸於日月伏惟光天文武大聖孝  
感皇帝陛下睿謨廣運元功莫測保天命以立極伏人心  
而戡難遂使妖不得爲災謀不得及伐動皆殲潰以靖神  
人如叔冀者曷爲力也徒以遠奉威靈獲全私懇雖堅守  
薄節轉戰微功而寵寄雄州榮兼獨坐爲叔冀之非望實  
舉宗之所懼今復割海岱之衆創立節度之權超將中軍



兼領仍舊受委斯重其憂轉深屬餘孽未除誅翦指日策  
勲飲至責其總戎勉勵之心仲伯之分以此思効不遑居  
寧臣緬維代業竊又自愧臣之父河西節度使先臣某叔  
冀之父平盧節度使先臣某皆中朝舊勲式遏寇虐東西  
故事人或賴焉而叔冀何功實膺克荷非臣所感時論皆  
榮追懷父子之軍信兼國家之報載兢載躍無以克堪臣  
雖隔中外義形骨肉事濟時康死復何恨無任感恩兢躍  
之至謹詣某門奉表陳謝以聞

爲崔鄴公謝除鳳翔節度使表

臣某言伏奉去月二十八日恩制加臣鳳翔尹仍充本府及秦隴等州節度觀察使伏以才淺遇深者敗公之本力微任重者職禍之由况鳳翔天京四方取則使增廉問千里準繩苟非其人是速官謗臣前月已再三懇讓實冀陛下矜臣不逮察臣無能忝侍朝廷獲保衰朽豈意堯曦下屬舜澤旁流荐降殊恩不許固讓恭承寵命感懼交懷臣其中謝伏惟陛下德耀三光勲崇萬古彝倫式序庶績其凝臣本謏才素乏籌畧謬膺任使累踐殊班顧無毫髮之功叨預邱山之寄今鳳翔近甸秦隴雄藩北有党項之虞

西有羌渾之患或阻絕我道路或侵軼我封疆王師出征則鳥散山谷官軍罷討則雨集郊圻臣雖不才庶竭孱懦必將勸分務穡訓卒利兵剿除兇殘式遏寇虐使黎元無俶擾之患里閭無暴殄之災下傾百慮之愚上補萬分之一臣無任感戴屏營之至

爲崔鄴公謝勅追赴京表

臣某言伏奉十二月日勅追赴京仍待史牘到卽發恩私曲被喜賀無從臣某中謝臣聞至誠感神雖微必應皇天鑒物無幽不通伏惟陛下道貫乾坤明懸日月千年一聖

金文三卷二  
四海在寧臣實何人時逢昌運近緣荆襄微擾尚軫聖憂  
不以臣之非才特加節制持綱憲府曳履文昌一日九遷  
頻煩忝竊常恐委身江外朝滄海而無因豈意復命闕庭  
隨白雲而有望遙思捧日預想朝天臣子之情倍萬恒品  
不勝感戴之至

爲崔僕射謝恩賜表

臣某言某官某至伏奉勅書仍賜手詔並諸錫賚等宸聰  
睿眷一以及臣舉族同歡致身無據臣某誠歡誠喜頓首  
頓首臣聞自古明哲之君以化天下也莫不乘時制變因

弊立法旣資體國亦在使人常準大端不失其道伏惟寶  
應元聖文武皇帝陛下隱旒思理宵衣布政臨萬物而含  
宏不測明四察而英斷非常去邪勿疑則滌除汚俗渴賢  
致理則振拔時淹納強諫而如流佇沃心而不足微臣何  
幸屬會昌期今四罪咸伏八蠻慕義祿有所及刑無所冤  
再鼓登聞申明理匭發令而雍熙日洽推心而反側自安  
何負阻而不來何假威而不敗太宗聖化復見於今文命  
賡歌詎慙希古日宣九德千載難逢然則靡不有初前史  
攸誠知始知卒惟聖能之今陛下發自宸衷殷勤詔命克

念作聖期於必然無任拜舞歡欣之至謹遣某官奉表陳賀以聞

爲崔僕射謝許弟寬宣慰表

臣寧言中使馬承倩至奉傳德音特自宸睠矜臣束身遠鎮弟兄別離許令弟寬與臣相見義切君父恩連骨肉神魂驚駭不知所之三生有涯萬死難報臣某中謝臣寬最小衆所鍾憐臣在劍門強逾二紀形影相弔未嘗棄離忽遇聖朝委臣方面在寬何有累踐班榮職綰通曹貴通三獨功慙汗馬業謝屠龍禁掖禮闈踰津越分每一念至刻

心如焚縱脂分戰場血染邊草未之云報降此無圖上感  
推心下排飛謗惟此之際臣知所安但以蕃寇外虞蒼黃  
後命飲至清廟或未剋期所冀暫來不失宣撫臣之願也  
每羨聯行獨憐迴鴈長思共易不著新衣無任感戴慙惶  
之至

爲崔僕射謝弟除給事中表

臣某言伏見某月日恩制除臣弟審給事中寵命自天驚  
魂無地永惟非據覲面何深臣某載兢載躍頓首頓首臣  
家本東周代傳素業衣冠祖襲豈望繁華至於伯仲雖聞

詩禮但欲官從詎知生遇聖明日加重寄擢臣偏將之下  
錄臣久戍之勤待罪西南時逾一紀分憂障塞心係兩蕃  
策無類于燒牛功有慚於求犬長懷尸素之責重貽門戶  
之羞今則恩聯兄弟澤及中外在審何有累踐通班未聞  
三諫之勤仍忝八年之寵將何以曲承顧問接武名儒分  
陪掖下之榮專掌殿中之事在盈知缺居寵思危臨深履  
薄莫之爲喻伏以王居渙汗方鎮途遙遠有所聞推謝無  
及空慙爲人之擇不遂免冠之讓臣無任喜躍屏營之至

爲西川崔僕射謝却赴劍南表



臣某言自中使馬承倩送臣却至所部漢州迴監軍使孟  
遊仙等續發北面拜天南旋舊鎮望九門而彌遠顧三蜀  
而何情如丹之心具列前表庶明臣子之分以期君父之  
知臣某中謝臣四度興師每各獻捷願將邊事親達宸聰  
比恐三軍阻臣行計潛裝密辦亦旣經年上都贏糧傍路  
支費事皆前定誓衆遂行日望京關天威咫尺豈知時乖  
運未屬彼外虞徵發之期指蹤又切進退難處彷徨以還  
有心未明有口猶閉若撻之恥空思於堯舜戀主之誠倍  
慚於犬馬臣知衙事官王忻傳遙自經驅使積有歲時言

行惟一爲臣腹心當今切務具如別狀悉令密啟遠達由  
衷伏乞聖慈俯迴神鑒仍賜容納許以畢辭天下幸甚天  
下幸甚其有不載文墨更令附口聞奏皆是剗心所陳豈  
爲億中之說儻可裨補雖死猶生區區赤實敢希萬一臣  
以今月某日却至成都訖整齊戎事卽赴行營西番動靜  
續冀聞奏衆星微象長拱北辰勺水細流盡朝東海惟臣  
不及飲恨何言無任感戀屏營之至謹奉表陳懇以聞

謝贈亡妻鄭國夫人表

臣某言某月日中使某至特蒙聖慈追贈妻單氏鄭國夫

人捧拜絲綸載光寵宥臣某中謝臣亡妻所生男憑見任御史中丞充張孝忠軍職務臣頃應援易定之日屬京師變亂之初臣方誓死迴軍星言赴難孝忠敵強勢弱切欲相留稍住則臣子不安往來則懷撫交闕男憑年甚幼小留定婚姻恭行廟勝之謀克覩中興之運憑雖昧稚似可優矜陛下猥賜寵章贈言聖善因子及母恭承孝理之風念往慰存爲屈哀榮之典旣申翟第追詠鵲巢恩光旣洽於幽明霈澤永流於泉壤憑緣所職久在定州殊私豈止於邱山感激實深於内外臣無任闕

爲商州吳仲儒中丞讓起復表

草土臣某言一昨瀝血上聞乞停新命聖情未察鄙心莫  
申捧對天書載崩載隕臣某中謝臣聞忠孝同道君親一  
致爲子能孝爲臣能忠苟或易茲固無所取臣幼多疹疾  
氣柔形羸臣父閔臣疴瘵時所鍾念一飯一藥皆自躬親  
十有餘年方至成立及臣委身戎幕効職塞垣頻歲馳驅  
頗乖視膳自授任中丞漸列班行始遂晨昏獲申祿養豈  
謂星霜未幾殃釁遽鍾拊心擗踊萬恨無及儻遂臣請得  
終禮制其於子道所負猶深如或遠別几筵苟從職事此

則禽獸不若名教所無於家尚然於國何有況聖恩一昨  
用臣之意本爲子儀奏聞當以蕃寇憑陵遠慮河中危迫  
謂臣舊將素習兵謀遂用起臣使當金革危難之日事或  
從權今郊壘無虞妖氛殘滅以臣苴經更齒衣冠自顧形  
骸實慙面目伏祈元造許以終喪殘喘餘魂死將不朽無  
任迷謬崩迫之至

爲楊相求退表

臣炎言比者盛夏無雨農人觖望遂軫聖慮迨乎孟秋乃  
下明詔並表羣祀神人協和膏澤旋降嘉穀無害災盛可

期此皆陛下明聖慈仁上應臣所以慚貌重位容身無地  
載積憂懼豈遑夙夜厯觀自昔帝王以理天下者未有不  
疇咨訐謨以熙帝載三五以降則有六相十六族共陳翼  
亮之功其在夏殷不易斯典逮周分六官秦置左右西漢  
因之以丞相東漢更名以三公魏晉雖有損益亦無獨任  
之道陛下拔臣江澤之外致臣密勿之地縱欲思報鴻造  
贊襄盛業其如智識薄劣力所不任常恐負乘之類無以  
塞責臣又聞之天有三台鼎有三足丞凝所以備四輔股  
肱所以象四體創明堂構大廈非一木之力焉況臣駑愚

而久備位今舞干以化戎狄修好網羅再張兆人是賴朝  
多賢達野無遺逸能勝臣者則指顧皆是豈以萬務之重  
而獨委於凡流乎縱臣一朝敗累分從隕越則旣墜之跡  
死將安謝伏乞俯迴天鑒退臣散地舉用伊臯使不仁者  
遠臣雖萬死誓無所恨不勝待罪兢惶之至

爲田僕射薨謝制使問表

臣某言左金吾將軍吳湊至奉聖旨兼賜臣母趙國太夫  
人臣嫂夫人并臣及將士等敕書以臣亡兄某特承憫問  
捧對哀咽摧裂肝心臣某中謝臣兄報恩未畢抱恨黃泉

陛下俯聽鼓鼙永悲簪履哀痛之詔併歸一門撫存之恩  
將宥十世載悲載躍感戴無階以亡兄旣忝信臣寡嫂則  
爲近屬偏承恤慰曲被恩慈義同家人禮絕朝典喻臣老  
母保養高年念臣諸孤俾全餘喘無大無小上煩聖慈寵  
光親降於重臣優問必先於宿將殞身難報拜手增悲臣  
無任荷恩哽咽之至

謝贈姊隴西郡夫人表

臣某言伏奉詔命賜王氏之姊隴西郡夫人恩澤送終寵  
賁中錫感戴無力幽冥有光臣某中謝臣少遭閔凶長姊



覆育中限王事動成遠辭奉迎纔至殂謝已及臣頃者近  
當劇賊遠候蕃戎方勤公家遂殺私禮瞻言痛慕有踰常  
品豈意詔書下降聖澤旁流念微臣之瑣功封及其姊迴  
聖代之茂典榮彼重泉未知何階仰答殊造庶將友愛之  
分用酬愷悌之恩臣無任荷恩哽咽之至